

შინაარსი

1.	ხელშეკრულების მოქმედების ფარგლები და იერარქია.....	2
2.	ტერმინთა განმარტება.....	2
3.	ნასყიდობის პირობები	3
4.	განცხადებები და გარანტიები.....	4
5.	ზოგადი დათქმები.....	5
6.	ანგარიშსწორების წესი	6
7.	ხელშეკრულების შეწყვეტა და შეწყვეტის შედეგები.....	6
8.	მხარეთა პასუხისმგებლობა.....	7
9.	კომუნიკაცია, შეტყობინებები.....	8
10.	ფორს-მაჟორი	8
11.	დავის განხილვის წესი.....	8
12.	დასკვნითი დებულებები.....	8

1. ხელშეკრულების მოქმედების ფარგლები და იერარქია

- 1.1. წინამდებარე ხელშეკრულება წარმოადგენს მხარეთა შორის დადებულ შეთანხმებას და ხელშეკრულების პირობების შესრულება სავალდებულოა მხარეთათვის;
- 1.2. ნასყიდობის ხელშეკრულებიდან გამომდინარე მხარეთა შორის არსებული სამართალური თითოეობა შედგება შემდეგი შეთანხმების/დოკუმენტებისაგან: ა) ნასყიდობის ხელშეკრულება (ძირითადი პირობები), ბ) ნასყიდობის ხელშეკრულება (არსებითი პირობები), გ) ნასყიდობის ხელშეკრულების დანართი. თითოეული მათგანი წარმოადგენს ხელშეკრულების ერთ მთლიანობას და ერთმანეთის განუყოფელ ნაწილს, ხელშეკრულების გაყოფილი ნაწილია აგრეთვე ნებისმიერი შეთანხმება წინამდებარე ხელშეკრულების ფარგლებში;
- 1.3. ნასყიდობის ხელშეკრულების ძირითად პირობებსა და ნასყიდობის ხელშეკრულებას (არსებითი პირობები) შორის შეუსაბამობისას, უპირატესობა ენიჭება ნასყიდობის ხელშეკრულებას, ხოლო ნასყიდობის ხელშეკრულებასა და მისი დანართის პირობებს შორის კონკურენციისას - დანართს. დანართებს შორის შეუსაბამობის არსებობის შემთხვევაში, უპირატესია დათქმა რომელიც წარმოადგენს უფრო ახალს და რომლითაც უკეთ მიიღწევა მხარეთა შორის არსებული ურთიერთობის მიზანი.

2. ტერმინთა განმარტება

ხელშეკრულებაში გამოყენებულ ტერმინებს ენიჭებათ ქვემოთ მოცემული მნიშვნელობა, იმ შემთხვევაში, თუ ხელშეკრულებით სხვა რამ არ არის განსაზღვრული ან/და მისი კონტექსტიდან სხვა რამ არ გამომდინარეობს.

- 2.1. **ხელშეკრულება** - წინამდებარე შეთანხმება, ნასყიდობის ხელშეკრულება, ნასყიდობის ხელშეკრულების დანართ(ები), ნებისმიერი შეთანხმება, რომელიც ფორმდება მხარეთა შორის ხელშეკრულების პირობების განსაზღვრის მიზნით;
- 2.2. **ნასყიდობის ხელშეკრულება** - შეთანხმება, რომელიც ფორმდება მხარეთა შორის და რომელიც შეიცავს ხელშეკრულების არსებითი პირობების შესახებ დათქმებს;
- 2.3. **ნასყიდობის ხელშეკრულების დანართი** - შეთანხმება, რომელიც განსაზღვრავს შეთანხმების დამატებით პირობებს, ერთვის ხელშეკრულებას და წარმოადგენს მის განუყოფელ ნაწილს, მიუხედავად დანართების რაოდენობისა;
- 2.4. **პრემიულა** - ხელშეკრულებაში მოცემული, დამატებითი განმარტებითი დათქმები (ასეთი არსებობის შემთხვევაში) ხელშეკრულების მიზნის და პირობათა განმარტებასთან დაკავშირებით. პრემიულა წარმოადგენს ხელშეკრულების განუყოფელ ნაწილს;
- 2.5. **ბანკი** - ნასყიდობის ხელშეკრულებით განსაზღვრული პირი, ვინც იძენს ხელშეკრულებით გათვალისწინებულ ნასყიდობის საგანს;
- 2.6. **გამყიდველი / კონტრაქტისტი** - ნასყიდობის ხელშეკრულებით განსაზღვრული პირი (ფიზიკური, იურიდიული ან საქართველოს ან სხვა ქვეყნის კანონმდებლობით გათვალისწინებული სხვა ორგანიზაციული წარმონაქმნი), რომელიც ნასყიდობის საგანზე საკუთრების უფლებას გადასცემს ბანკს;
- 2.7. **მხარე** - ბანკი ან გამყიდველი, კონტექსტის შესაბამისად;
- 2.8. **მხარეები** - ბანკი და გამყიდველი ერთად;
- 2.9. **მესამე პირი** - ნებისმიერი მესამე პირი, გარდა მხარეებისა;
- 2.10. **დაკავშირებული პირი** - ბანკის შვილობილი ან/და მშობელი კომპანია, ასევე კომპანია, რომელიც წარმოადგენს ბანკის მშობელი კომპანიის შვილობილს;
- 2.11. **ნასყიდობის საგანი** - ნივთი, მოძრავი ნივთი, მოთხოვნის უფლება ან/და ნებისმიერი სახით არსებული არამატერიალური ქონებრივის სიკეთე, რაც წინამდებარე ხელშეკრულების შესაბამისად, საკუთრებაში გადაეცემა ბანკს; ნასყიდობის საგნის აღწერილობა/სპეციფიკაცია ან/და ჩამონათვალი მოცემულია ნასყიდობის ხელშეკრულებაში ან/და მისსავე დანართში;
- 2.12. **მიღება-ჩაბარების აქტი** - დოკუმენტი, რომელიც შესაძლოა გაფორმდეს ბანკსა და გამყიდველს შორის გამყიდველის მიერ ბანკისთვის ნასყიდობის საგნის გადაცემის და ბანკის მიერ მისი მიღების დასტურად;
- 2.13. **ნასყიდობის ფასი** - ფულადი თანხა, რომელსაც ხელშეკრულებით დადგენილი ოდენობითა და წესით ბანკი გადაუხდის გამყიდველს ნასყიდობის საგანზე საკუთრების უფლების მოპოვების სანაცვლოდ. ამასთან, ნასყიდობის ფასი მოიცავს საქართველოს საგადასახადო კოდექსით გათვალისწინებულ ყველა გადასახადს. ყოველგვარი ეჭვის გამორიცხვის მიზნით მხარეები თანხმდებიან, რომ გადასახადების ქვეშ მხარეები გულისხმობენ მხოლოდ იმ გადასახადებს, რომლის გადახდის ვალდებულება გამყიდველს აქვს/წარმოეშობა ხელშეკრულების საფუძველზე.
- 2.14. **გარანტია** - გამყიდველის ვალდებულება, საკუთარი ხარჯითა და ძალისხმევით გამოასწოროს ნასყიდობის საგანთან დაკავშირებული ნებისმიერი ნაკლი და/ან ხარვეზი, რომელიც წარმოიშვება საგარანტიო პერიოდში;
- 2.15. **სამუშაო დღე** - დღე, გარდა შაბათისა და კვირისა, აგრეთვე კანონმდებლობით დადგენილი უქმე დღეებისა;
- 2.16. **კანონმდებლობა** - საქართველოს მოქმედი საკანონმდებლო და კანონქვემდებარე ნორმატიული აქტები, აგრეთვე, საქართველოს ნორმატიულ აქტთა სისტემაში მოქცეული საერთაშორისო ხელშეკრულებები და შეთანხმებები;
- 2.17. **ინტელექტუალური საკუთრება** - წინამდებარე ხელშეკრულების ფარგლებში, გამყიდველის მიერ ბანკისთვის გადაცემულ ნასყიდობის საგანზე ინტელექტუალური საკუთრების უფლება, რომელიც წარმოადგენს ინტელექტუალური შემოქმედებითი საქმიანობის შედეგს, მიუხედავად მისი გამოხატვისა საშუალებისა და

ფორმისა და რომელიც წარმოადგენს კანონმდებლობით მოწესრიგებულ ქონებრივი და პირადი არაქონებრივი უფლებების (მათ შორის, საავტორო და მომიჯნავე გამოგონება, დიზაინი და ა.შ.) საგანს;

- 2.18. **დღე** - კალენდარული დღე;
- 2.19. **საბანკო დღე** - დღე (შაბათის, კვირის ან საქართველოს კანონმდებლობით განსაზღვრული ოფიციალური დასვენების დღეების გარდა), როდესაც ბანკი ღიაა და წარმართავს საბანკო საქმიანობას;
- 2.20. **უფლებრივად უნაკლო ნივთი** - ნასყიდობის საგანი, რომლის მიმართ მესამე პირ(ებ)ს არ შეუძლიათ გამოიყენონ რაიმე სახის უფლებები ბანკის წინააღმდეგ ან/და წარუდგინონ ბანკს პრეტენზია აღნიშნული უფლებების გამო;
- 2.21. **ნივთობრივად უნაკლო ნივთი** - ნასყიდობის საგანი, რომელიც არის გამოუყენებელი, ვარგისია ჩვეულებრივი საქმიანობისათვის, შეესაბამება ბანკთან წინასწარ შეთანხმებულ ხარისხს და პირობებს
- 2.22. **ქვეკონტრაქტორ(ებ)ი** - მესამე პირ(ებ)ი, რომლებთანაც არსებული ხელშეკრულებების საფუძველზე გამყიდველი უზრუნველყოფს მის მიერ ხელშეკრულებით ნაკისრი ვალდებულებების სრულ და ჯეროვან შესრულებას;
- 2.23. **გამყიდველის თანამშრომელი** - ნებისმიერი პირი, რომელიც მოქმედებს გამყიდველის სახელით, მიუხედავად იმისა, არის თუ არა ის შრომით/სახელშეკრულებო ურთიერთობებში გამყიდველთან და აქვს თუ არა შესაბამისი უფლებამოსილება მინიჭებული გამყიდველისგან;
- 2.24. **მწარმოებელი** - პირი, რომელიც აწარმოებს ნასყიდობის საგანს, ან გამოაქვს ის რაიმე ფორმით სარეალიზაციოდ;
- 2.25. **ეროვნული ვალუტა** - საქართველოს ეროვნული ვალუტა;
- 2.26. **უცხოური ვალუტა** - ნებისმიერი ვალუტა, გარდა ეროვნულ ვალუტისა;
- 2.27. **კონფიდენციალური ინფორმაცია** - ნებისმიერი ინფორმაცია, მიუხედავად მისი ფორმისა (მათ შორის მატერიალური და ელექტრონული ფორმით), რომელიც წარმოადგენს ბანკის და/ან ბანკთან საქმიან ურთიერთობაში მყოფი ნებისმიერი პირის ნებისმიერ ინფორმაციას (მათ შორის, ტექნიკური და ფინანსური მონაცემები, ბანკის მფლობელობაში არსებული ობიექტების ელექტრომომარაგების გაყვანილობის, სიგნალიზაციის და/ან უსაფრთხოების სისტემების შესახებ ინფორმაცია, ანალიტიკური მასალები, დოკუმენტები, ხელშეკრულებები, შიდა სახელმძღვანელო დოკუმენტაცია და ა.შ.), რომელიც შეიძლება ხელმისაწვდომი გახდეს გამყიდველის ან/და გამყიდველის თანამშრომლისათვის;
- 2.28. **პერსონალური მონაცემები** - ნებისმიერი ინფორმაცია, რომელიც უკავშირდება იდენტიფიცირებულ ან იდენტიფიცირებად ფიზიკურ პირს. პირი იდენტიფიცირებადია, როდესაც შესაძლებელია მისი იდენტიფიცირება პირდაპირ ან არაპირდაპირ, კერძოდ, საიდენტიფიკაციო ნომრით ან პირის მახასიათებელი ფიზიკური, ფიზიოლოგიური, ფსიქოლოგიური, ეკონომიკური, კულტურული ან სოციალური ნიშნებით;
- 2.29. **პირგასამტეხლო/ჯარიმა** - ხელშეკრულებით განსაზღვრული ფულადი თანხა, რომლის გადახდაც მხარეს დაეკისრება ხელშეკრულებით ნაკისრი ვალდებულებების დარღვევის შემთხვევაში, ხელშეკრულებით განსაზღვრული პირობებით. ამასთან, პირგასამტეხლოს დაანგარიშება დაიწყება დამრღვევი მხარის მიერ ნაკისრი ვალდებულებების შეუსრულებლობის ან/და არაჯეროვანი შესრულების მომენტიდან, თუ ხელშეკრულებით სხვა რამ არ იქნება გათვალისწინებული, ხოლო პირგასამტეხლოს გადახდის ვალდებულება ხელშეკრულების დამრღვევ მხარეს წარმოეშვება, მხოლოდ მეორე მხარის მოთხოვნის საფუძველზე.
- 2.30. **საგარანტიო პერიოდი** - ნასყიდობის ხელშეკრულებით განსაზღვრული ვადა, რომლის ათვლა დაიწყება ნასყიდობის საგნის ბანკისათვის გადაცემის დადასტურების მომდევნო დღიდან და რომლის განმავლობაშიც მოქმედებს გარანტია;
- 2.31. **მოთხოვნა** - ბანკის მიერ გამყიდველისთვის ხელშეკრულებაში აღნიშნული მხარეთა ელექტრონული ფოსტის მისამართების გამოყენებით გაგზავნილი ელექტრონული შეტყობინების და/ან სატელეფონო შეტყობინების და/ან მხარეთა შორის შეთანხმებული სხვა სახით გაგზავნილი შეტყობინება, რომლითაც ბანკის მიერ განისაზღვრება გასაწევი ნასყიდობის საგმ მოცულობა, მახასიათებლები, და სხვა დეტალები.

3. ნასყიდობის პირობები

- 3.1. ხელშეკრულების საფუძველზე გამყიდველი ბანკს გადასცემს საკუთრების უფლებას ნასყიდობის საგანზე;
- 3.2. გამყიდველის მიერ ბანკისთვის ნასყიდობის საგნის მიწოდება მოხდება ნასყიდობის ხელშეკრულების შესაბამისად, ამავე ხელშეკრულებით განსაზღვრულ ვადაში; იმ შემთხვევაში, თუ ხელშეკრულება ითვალისწინებს ნასყიდობის საგნის მრავალჯერადად, ეტაპობრივ მიწოდებას, გამყიდველის მიწოდებას განახორციელებს ბანკის მიერ გაგზავნილი მოთხოვნის შესაბამისად; მიწოდების ვადის ათვლა იწყება მოთხოვნის გაგზავნის დღიდან; გამყიდველი ვისრულობს ვალდებულებას, ნასყიდობის საგანი ბანკს მიაწოდოს ნასყიდობის ხელშეკრულებით განსაზღვრულ ადგილას;
- 3.3. გამყიდველი ვალდებულია, მიაწოდოს ბანკს ნასყიდობის საგანთან (საგანთან) დაკავშირებული დოკუმენტაცია, მათ შორის მწარმოებლის მიერ თანდართული დოკუმენტაცია, საგარანტიო დოკუმენტები, მოძრავი ნივთის ექსპლუატაციის სახელმძღვანელო და სხვ.
- 3.4. ნასყიდობის საგნის მიწოდების (ნასყიდობის საგნის მიწოდების ადგილზე მიტანის) ხარჯი, ისევე როგორც ნასყიდობის საგნის განბაჟების ხარჯი, გათვალისწინებულია ნასყიდობის ფასში (გარდა იმ შემთხვევისა, სხვაგვარად არ არის შეთანხმებული ნასყიდობის ხელშეკრულებით ან/და დანართით). გამყიდველი ვალდებულია დადოს ყველა საჭირო გარიგება ნასყიდობის საგნის მიწოდება/ტრანსპორტირებისთვის;

- 3.5. ნასყიდობის საგნის ბანკისათვის გადაცემა დასტურდება შესაბამისი სასაქონლო ზედნადების ან/და მიღება-ჩაბარების აქტის მხარეთა მიერ ხელმოწერით.
- 3.6. ნასყიდობის საგანზე ბანკის საკუთრების უფლება წარმოიშობა სასაქონლო ზედნადების ან/და მიღება-ჩაბარების აქტის ხელმოწერისთანავე და აღნიშნული მომენტიდან გადადის ბანკზე ნასყიდობის საგნის შემთხვევითი დაღუპვის ან გაფუჭების რისკი. ბანკი უფლებამოსილია, არ მოაწეროს ხელი სასაქონლო ზედნადებს და/ან მიღება-ჩაბარების აქტს, რაც არ ჩაითვლება მიწოდებად, ან იმოქმედოს საქართველოს საგადასახადო კანონმდებლობის მიხედვით დადგენილი წესის შესაბამისად, თუ ნასყიდობის საგანი რაოდენობრივად და/ან თვისობრივად/ხარისხობრივად არ შეესაბამება ხელშეკრულებით შეთანხმებულ პირობებს. ყოველგვარი ეჭვის გამორიცხვის მიზნით მხარეები თანხმდებიან, რომ მიუხედავად ბანკის მიერ სასაქონლო ზედნადების ან/და მიღება-ჩაბარების აქტის ხელმოწერისა, თუ, მიწოდებული ნასყიდობის საგნის რაოდენობის ან/და ხასიათის გათვალისწინებით შეუძლებელია მისი ხარისხის დაუყოვნებლივ სრულყოფილად შემოწმება და აღმოჩნდება, რომ ნასყიდობის საგნის ხარისხობრივი მაჩვენებლები არ შეესაბამება ხელშეკრულებით შეთანხმებულ პირობებს, ბანკი უფლებამოსილია სასაქონლო ზედნადების ან/და მიღება-ჩაბარების აქტის ხელმოწერიდან 5 (ხუთი) სამუშაო დღის განმავლობაში უკან დაუბრუნოს გამყიდველს მიწოდებული ნასყიდობის საგანი სრულად ან ნაწილობრივ და მოსთხოვოს შეუსაბამობის გამოსწორება. ამ შემთხვევაში მხარეთა შორის გაფორმდება მიღება-ჩაბარების აქტი სადაც მიეთითება ნასყიდობის საგნის რა რაოდენობა მიიჩნევა ბანკის მიერ მისაღებად და რა – მიუღებლად. შეუსაბამო ნასყიდობის საგანი უნდა ჩანაცვლდეს ნასყიდობის საგნის მიწოდების ვადაში, რომელიც მითითებულია ნასყიდობის ხელშეკრულებაში და რომლის ათვლა დაიწყება ამ პუნქტით გათვალისწინებული მიღება-ჩაბარების აქტის გაფორმების დღიდან. ამასთან, დასაშვებია, რომ შეუსაბამობის აღმოფხვრის ნაცვლად, მოხდეს ნასყიდობის ფასის შემცირება შესაბამისი ოდენობით; ამ შემთხვევაში მიღება-ჩაბარების აქტში აგრეთვე მიეთითება - ნასყიდობის ფასის შემცირებული ოდენობა; ბანკი აგრეთვე უფლებამოსილია, გამყიდველისთვის შესაბამისი ინფორმაციის მიწოდების შემდეგ, თავად აღმოფხვრას ნივთის ნაკლი და შემდგომ მოსთხოვოს გამყიდველს ნაკლის გამოსწორებისათვის გაწეულის ხარჯის, მათ შორის ზიანის (ზარალის), სრულად ანაზღაურება;
- 3.7. გამყიდველი ვალდებულია ბანკს გადასცეს ნივთობრივად და უფლებრივად უნაკლო ნასყიდობის საგანი;
- 3.8. თუ ნასყიდობის ხელშეკრულების შესაბამისად, გამყიდველი ბანკს აძლევს გარანტიას, გამყიდველი ვალდებულია ამავე ხელშეკრულებით განსაზღვრულ ვადაში გამოასწოროს ნასყიდობის საგნის ნაკლი და/ან ხარვეზი ან იმავე ვადაში შეცვალოს ნასყიდობის საგანი იგივე მახასიათებლების მქონე ნივთით.
- 3.9. გამყიდველი არ არის უფლებამოსილი შეცვალოს/გაზარდოს ნასყიდობის საგნის ფასი. იმ შემთხვევაში, თუ გამყიდველის მიიჩნევა რომ სახეზეა ფასის ცვლილების წინაპირობა, იგი ვალდებულია ასეთი გარემოების შესახებ წინასწარ აცნობოს ბანკს და მოთხოვნის შემთხვევაში წარუდგინოს აუდიტორული დასკვნა, რითაც დადასტურდება ფასის ცვლილების აუცილებლობა. ბანკი უფლებამოსილია, ასეთი გარემოების არსებობისას შეცვალოს ხელშეკრულების საფასური ან/და ცალმხრივად შეწყვიტოს ხელშეკრულება;
- 3.10. იმ შემთხვევაში, თუ წინამდებარე ხელშეკრულების შესრულებისთვის, გამყიდველი იყენებს თანამშრომლებს, ქვეკონტრაქტორებს, მწარმოებელს, გამყიდველი მხოლოდ თვითონ წარმოადგენს პასუხისმგებელ პირს ბანკის წინაშე.
- 3.11. ხელშეკრულებით გათვალისწინებული დათქმები არ გამორიცხავს ბანკის უფლებას ისარგებლოს მომხმარებელთა უფლებების დაცვის შესახებ კანონით, მომხმარებლისთვის განსაზღვრული უფლებებით.

4. განცხადებები და გარანტიები

- 4.1. მხარეები აცხადებენ და გარანტიას გასცემენ, რომ:
 - 4.1.1. აქვთ სრული უფლებამოსილება და მიღებული აქვთ ყველა საჭირო თანხმობა/ნებართვა, მათ შორის ადმინისტრაციული ორგანოსგან, რათა დადონ ხელშეკრულება და შეასრულონ ხელშეკრულებით ნაკისრი ვალდებულებები;
 - 4.1.2. ხელშეკრულების დადებით არ არღვევენ კანონმდებლობას, სხვა პირებთან არსებულ სახელშეკრულებო ურთიერთობას და ხელშეკრულება შესაბამისობაშია სადამფუძნებლო დოკუმენტებთან;
 - 4.1.3. წარმოადგენენ გადამხდელუნარიან პირს, რომელთა მიმართ არ მიმდინარეობს გადახდისუუნარობის (გაკოტრების ან რეაბილიტაციის) საქმისწარმოება, ლიკვიდაციის პროცესი ან/და არ არსებობს სხვა სახის გარემოება, რომელიც ხელს შეუშლის მხარეთა მიერ ხელშეკრულებით ნაკისრი ვალდებულებების სრულ და ჯეროვან შესრულებას;
 - 4.1.4. მათი საქმიანობა აკმაყოფილებს გარემოსდაცვით, ჯანდაცვის, უსაფრთხოებისა და შრომის მარეგულირებელი ყველა ნორმატიული აქტის მოთხოვნებს და ხსენებული მოთხოვნები დაცული იქნება სახელშეკრულებო ურთიერთობის ნებისმიერ ეტაპზე.
 - 4.1.5. იცავენ ადამიანს უფლებებსა და თავისუფლებებს როგორც აბსოლუტურ ღირებულებას და თავი ბიზნეს საქმიანობას წარმართავენ აღნიშნული ღირებულებების დაცვით. საქმიანობის პროცესში არ არღვევენ შრომის კანონმდებლობით გათვალისწინებულ ძირითად პრინციპებს, ხელს არ უწყობენ მონურ შრომას და მკაცრად გამოხედავენ პირთა შორის დისკრიმინაციას.
 - 4.1.6. თითოეული მათგანი თავის საქმიანობასა და ბიზნეს ურთიერთობებს წარმართავს კეთილსინდისიერად და მართლზომიერად, ეთიკის მაღალი სტანდარტების დაცვით. მხარეებს გააჩნიათ ნულოვანი ტოლერანტობა

კორუფციის, მექრთამეობის, საგადასახადო თაღლითობის, გადასახადებისგან თავის არიდების და ნებისმიერი სხვა სახის დანაშაულებრივი ქმედებების მიმართ და აღნიშნულ საკითხებს უწევენ მუდმივ კონტროლს.

4.2. გამყიდველი ადასტურებს, რომ

4.2.1. ხელშეკრულების შესრულებისას არ დაუშვებს მესამე პირთა უფლებების, მათ შორის, ინტელექტუალურ-სამართლებრივი უფლებების, დარღვევას;

4.2.2. ხელშეკრულების დადების მომენტისთვის ბანკისგან მიღებული აქვს საჭირო ინფორმაცია;

4.2.3. თვითონ, მისი დამფუძნებლები, მენეჯმენტი ან აღმასრულებელი/სამეთვალყურეო ორგანოს წევრები, ასევე მისი ბენეფიციარი მესაკუთრე(ებ)ი ან/და მათთან აფილირებული პირები (რაც ამ პუნქტის მიზნებიდან გამომდინარე, მათ შორის, წარმოადგენს ნებისმიერ პირს, რომელსაც ბანკის შეფასებით, მათ შორის, სანქციის მიზნიდან, საქმიანი, ნათესაური თუ სხვა ტიპის მჭიდრო კავშირიდან გამომდინარე შესაძლოა გავლენა ჰქონდეს პირზე ან მის გადაწყვეტილებებზე, პირდაპირ ან არაპირდაპირ ფლობდეს ან/და აკონტროლებდეს მას) ამ ხელშეკრულების ხელმოწერამდე ან/და მისი მოქმედების განმავლობაში ნებისმიერი დროს:

4.2.3.1. არ არიან/იქნებიან გაერთიანებული ერების ორგანიზაციის (გაერო) ან/და ევროკავშირის ან/და გაერთიანებული სამეფოს ან/და ამერიკის შეერთებული შტატების ან/და საქართველოს ან/და რომელიმე სხვა სახელმწიფოს ან/და საერთაშორისო ორგანიზაციის (შემდგომში ერთად ან ცალ-ცალკე „უფლებამოსილი პირ(ებ)ი“) მიერ სანქცირებულ პირთა სიაში (შემდგომში „სანქცირებულ პირთა სია“), ან/და მათ მიმართ არ მოქმედებს/იმოქმედებს სანქცია (ამ პუნქტის მიზნებისთვის სანქცია, მათ შორის, მოიცავს უფლებამოსილი პირების მიერ განსაზღვრულ შეზღუდვას, პოლიტიკას, აკრძალვას, ან სხვა სახის მითითებას).

4.2.3.2. არ არიან/იქნებიან იმ სახელმწიფოს რეზიდენტები, რომელზეც უფლებამოსილი პირ(ებ)ის მიერ ვრცელდება სრული სავაჭრო სანქციები/შეზღუდვები;

4.2.3.3. პირდაპირ ან/და ირიბად, მათ შორის სხვა პირ(ებ)ის მეშვეობით არ დაუდიათ/დადებენ ნებისმიერ გარიგებას (მათ შორის ხელს არ შეუწყობენ გარიგების დადებას) ნებისმიერ პირთან ან/და გაერთიანებასთან, რომელიც შეყვანილია/შეყვანილ იქნება სანქცირებულ პირთა სიაში/მასზე გავრცელებული იქნება სანქცია ან/და რომელიც არის იმ სახელმწიფოს რეზიდენტი ან/და საქმიანობს ტერიტორიაზე, რომელზეც ვრცელდება სრული სავაჭრო სანქციები/შეზღუდვები;

4.2.3.4. პირდაპირ ან/და ირიბად, მათ შორის სხვა პირ(ებ)ის მეშვეობით არ დაუდიათ/დადებს ნებისმიერ გარიგებას (მათ შორის ხელს არ შეუწყობს გარიგების დადებას) ისეთ მხარესთან/ქონებასთან/აქტივთან/პროდუქციასთან/ მომსახურებასთან დაკავშირებით, რომელზეც ვრცელდება სრული ან/და მიზნობრივი ან/და სექტორული სანქციები/შეზღუდვები.

5. ზოგადი დათქმები

5.1. გამყიდველი კისრულობს ვალდებულებას, დაუყოვნებლივ, წერილობით, აცნობოს ბანკს ყველა იმ გარემოებ(ებ)ის შესახებ, რომელიც შეიძლება წინააღმდეგობაში მოვიდეს მის მიერ დადასტურებულ განცხადებებთან ან/და გამოიწვიოს აღნიშნული გარანტიების დარღვევა.

5.2. გამყიდველი ვალდებულია ხელშეკრულების მოქმედების პერიოდში თავისი სამართლებრივი სტატუსის ცვლილების შესახებ დაუყოვნებლივ აცნობოს ბანკს, წინააღმდეგ შემთხვევაში, მატერიალური პასუხისმგებლობა ადმინისტრაციული ორგანოს მხრიდან ბანკისთვის წამოყენებულ ნებისმიერ მოთხოვნაზე დაეკისრება გამყიდველს.

5.3. წინამდებარე ხელშეკრულების ფარგლებში მხარეებს შორის გაცვლილი ნებისმიერი ინფორმაცია, როგორც დოკუმენტური ასევე ზეპირი სახით წარმოადგენს მკაცრად კონფიდენციალურს. შესაბამისად, თითოეული მხარე ვალდებულია მკაცრად კონფიდენციალურად შეინახოს მიღებული ინფორმაცია და არ დაუშვას მისი გამჟღავნება სხვა ნებისმიერი მესამე პირისთვის; მხარე ვალდებულია მიმართოს ყველა ძალისხმევას რათა, არ ჰქონდეს წვდომა კონფიდენციალურ ინფორმაციასთან სხვა მესამე პირს, ხოლო ასეთი შემთხვევის დადგომის შემთხვევაში დაუყოვნებლივ უნდა აცნობოს მეორე მხარეს და გამოიყენოს ყველა ღონისძიება შექმნილი გარემოების აღმოსაფხვრელად. მხარე იღებს ვალდებულებას თავად აანაზღაუროს ყველა ის ზიანი, რაც შესაძლოა მიადგეს მეორე მხარეს კონფიდენციალური ინფორმაციის უკანონო გამჟღავნების შედეგად (მათ შორის საქმიანი რეპუტაციის შელახვის შედეგად), ზიანის ოდენობის მიუხედავად. პასუხისმგებლობა არ დადგება საქართველოს კანონმდებლობით გათვალისწინებული წესით და პირობებით, კონფიდენციალური ინფორმაციის გავრცელების/გადაცემის შემთხვევაში. აღნიშნული პუნქტით დადგენილი ვალდებულებები ძალაში რჩება ხელშეკრულების შეწყვეტის შემდეგ, შეწყვეტის თარიღიდან 5 (ხუთი) წლის განმავლობაში.

5.4. იმ შემთხვევაში, თუ წინამდებარე ხელშეკრულების ფარგლებში მეორე მხარისთვის ცნობილი გახდა ბანკის კლიენტების ან დაკავშირებული პირების პერსონალური მონაცემი, მეორე მხარე ვალდებულია, პერსონალური მონაცემები დაამუშაოს მხოლოდ წინამდებარე ხელშეკრულების ფარგლებში კონკრეტული მიზნის მისაღწევად და მოქმედი კანონმდებლობის შესაბამისად; დაუშვებელია პერსონალურ მონაცემთა გადაცემა ნებისმიერი მესამე პირისთვის ასევე მონაცემთა დამუშავება აუცილებელ ფარგლებს მიღმა. პერსონალური მონაცემების დაცვის აუცილებლობა ვრცელდება ნებისმიერ პერსონალურ მონაცემზე მიუხედავად იმისა რომ თუ რა წყაროდან გახდა ცნობილი გამყიდველისთვის პერსონალური მონაცემი; მხარე ვალდებულია თავად აანაზღაუროს ყველა ის ზიანი,

რაც შესაძლოა მიადგეს მეორე მხარეს პერსონალური მონაცემების ნებისმიერი ფორმით არასწორად დამუშავების შედეგად, ზიანის ოდენობის მიუხედავად, მათ შორის ადმინისტრაციული ორგანოს მიერ ბანკისთვის პასუხისმგებლობის დაკისრების შემთხვევაში.

- 5.5. გამყიდველს უფლება არ აქვს, ბანკის წერილობითი ნებართვის გარეშე, მესამე პირს დაუთმოს ხელშეკრულებიდან გამომდინარე უფლებები და/ან მესამე პირს გადააკისროს ხელშეკრულებით ნაკისრი ვალდებულებები. ბანკი უფლებამოსილია, გამყიდველის წერილობითი ნებართვის გარეშე, მესამე პირს დაუთმოს ხელშეკრულებიდან გამომდინარე უფლებები და/ან მესამე პირს გადააკისროს ხელშეკრულებით ნაკისრი ვალდებულებები.
- 5.6. ხელშეკრულების ფარგლებში შექმნილ ინტელექტუალურ პროდუქტთან დაკავშირებით მხარეები თანხმდებიან შემდეგზე:
 - 5.6.1. ხელშეკრულების ფარგლებში გამყიდველის მიერ ბანკისათვის შექმნილ ან/და გადაცემულ ნასყიდობის საგანზე ინტელექტუალური საკუთრება და „საავტორო და მომიჯნავე უფლებების შესახებ“ საქართველოს კანონით გათვალისწინებული ყველა ქონებრივი საავტორო უფლებები გადაეცემა ბანკს. აღნიშნული მიზნებისთვის, გამყიდველი ვალდებულია, თავად ჰქონდეს მოპოვებული ყველა საჭირო უფლება და თანხმობა, თუ ასეთი გადაცემა მოითხოვს თანხმობის მიღებას მესამე პირებისგან;
 - 5.6.2. ბანკის მიერ გამყიდველისთვის ზემოაღნიშნული ინტელექტუალური საკუთრების და ქონებრივი საავტორო უფლებების გადაცემისათვის დამატებითი საფასური გადაიხდება მხოლოდ იმ შემთხვევაში, თუ მხარეები ამაზე ცალკე სპეციალურად შეთანხმდებიან, სხვა შემთხვევაში, ნასყიდობის საგნის ფასი მოიცავს ინტელექტუალურ საკუთრებასთან დაკავშირებული უფლებების ღირებულებას.
 - 5.6.3. ბანკი უფლებამოსილია თავისი შეხედულებისამებრ გადაწყვიტოს გამოიყენოს ან არ გამოიყენოს ხელშეკრულების საფუძველზე მისთვის შექმნილი/გადაცემული ინტელექტუალურ პროდუქტი და ბანკის მიერ აღნიშნული ინტელექტუალური პროდუქტის არ გამოყენების ფაქტი არ გამოიწვევს მასზე/მათზე ბანკის ინტელექტუალური საკუთრების და ქონებრივი საავტორო უფლებების დაკარგვას/გაუქმებას და გამყიდველისთვის დაბრუნებას.

6. ანგარიშსწორების წესი

- 6.1. ნასყიდობის საგნის ფასი ოდენობა, მისი გადახდის ვადა/ვადები და პირობები განისაზღვრება ნასყიდობის ხელშეკრულებით;
- 6.2. მხარეთა შორის ანგარიშსწორება წარმოებს ეროვნული ვალუტით. საფასურის უცხოური ვალუტით განსაზღვრის შემთხვევაში, ბანკი გაყიდველს საფასურს გადაუხდის ეროვნული ვალუტით უნაღდო ანგარიშსწორებით - გადახდის დღისთვის საქართველოს ეროვნული ბანკის მიერ დადგენილი გაცვლითი კურსის შესაბამისად. ბანკი საფასურს გადარიცხავს ხელშეკრულებაში განსაზღვრულ საბანკო ანგარიშზე.
- 6.3. ბანკი გამყიდველს საფასურს გადაუხდის ხელშეკრულებით განსაზღვრულ ვადაში. ამასთან, თუ გამყიდველი არის ან გახდება დამატებული ღირებულების გადასახადის გადამხდელი, ბანკის მოთხოვნის შემთხვევაში, ვალდებულია ბანკის მიერ ნასყიდობის საგნის მიღებიდან 3 (სამი) სამუშაო დღის ვადაში, საქართველოს საგადასახადო კანონმდებლობით დადგენილი წესით, ელექტრონულად, წარუდგინოს ბანკს საგადასახადო ანგარიშფაქტურა. ბანკი უფლებამოსილია, არ გადაიხადოს ნასყიდობის ფასი, სანამ გამყიდველი არ შეასრულებს ამ პუნქტით ნაკისრ (საგადასახადო ანგარიშფაქტურის მიწოდების) ვალდებულებას.
- 6.4. გამყიდველი ადასტურებს, რომ როგორც კვალიფიციური დღგ-ის გადამხდელი პირი უფლებამოსილია, გამოწეროს საქართველოს საგადასახადო კოდექსით გათვალისწინებული სტანდარტული საგადასახადო ანგარიშ-ფაქტურა/საგადასახადო დოკუმენტი, რომლის მეშვეობითაც განხორციელდება დღგ-ის ჩათვლა. აღნიშნული პირობის დარღვევის შემთხვევაში გამყიდველი ვალდებულია აუნაზღაუროს ბანკს დარღვევის შედეგად დამდგარი ზიანი, მათ შორის ბანკის მიერ გამყიდველის სახელით და მის სასარგებლოდ ბიუჯეტში გადახდილი დღგ-ს ტოლი თანხის ოდენობით.
- 6.5. საფასურის გადახდის თარიღად მიიჩნევა ბანკის მიერ შესაბამისი საგადახდო დავალების შესრულების დღე.
- 6.6. ბანკს უფლება აქვს ამ ხელშეკრულების საფუძველზე წარმოშობილი გამყიდველის ფულადი ვალდებულებების შესრულების მიზნით, გამყიდველის შემდგომი თანხმობის, ან ნებართვის გარეშე, ასეთი ვალდებულების წარმოშობის შემდეგ ნებისმიერ დროს, უაქცეპტო წესით ჩამოწეროს შესაბამისი თანხები გამყიდველის ნებისმიერი სახის საბანკო ანგარიშიდან. სხვადასხვა ვალუტაში თანხის ჩამოწერის დროს, კონვერტაციის საჭიროების შემთხვევაში, კონვერტაცია განხორციელდება სს "თიბისი ბანკის" მიერ თანხის ჩამოწერის მომენტისათვის დადგენილი კომერციული კურსით.

7. ხელშეკრულების შეწყვეტა და შეწყვეტის შედეგები

- 7.1. წინამდებარე ხელშეკრულება შესაძლოა შეწყდეს შემდეგ შემთხვევებში:
 - 7.1.1. ბანკის მიერ ცალმხრივად ვადამდე სრულად ან ნაწილობრივ, თუ გამყიდველი არ ასრულებს ან არაჯეროვნად ასრულებს (მათ შორის ვადის გადაცილებით) ხელშეკრულებით განსაზღვრულ ნებისმიერ ვალდებულებას (მათ შორის განცხადებებს და გარანტიებს, ნებისმიერ პირობას ან/და სხვა ვალდებულებას) და ბანკის მიერ წერილობით განსაზღვრულ დამატებით ვადაშიც სრულად და ჯეროვნად არ შესრულდება ვალდებულება, არ აღმოფხვრება ვალდებულების დარღვევა;

- 7.1.2. ბანკის მიერ ცალმხრივად, გამყიდველისთვის არანაკლებ 30 (ოცდაათი) კალენდარული დღით ადრე შეტყობინებით, იმ შემთხვევაში თუ ხელშეკრულების ვადა აღემატება 60 (სამოცი) დღეს, ხოლო 1 (ერთი) დღით ადრე შეტყობინებით, იმ შემთხვევაში, თუ ხელშეკრულების ვადა ნაკლებია 60 (სამოცი) დღეზე, გარდა იმ შემთხვევისა, როდესაც შეწყვეტისთვის არსებობს გადაუდებელი ინტერესი;
- 7.1.3. გამყიდველის ინიციატივით, თუ ბანკი არ ასრულებს გამყიდველისთვის საფასურის გადახდის ვალდებულებას;
- 7.1.4. მხარეთა წერილობითი შეთანხმებით;
- 7.1.5. ხელშეკრულებით ან/და საქართველოს კანონმდებლობის იმპერატიული ნორმებით პირდაპირ გათვალისწინებულ სხვა შემთხვევებში;
- 7.2. იმ შემთხვევაში, თუ გამყიდველს ხელშეკრულების ან კანონმდებლობის საფუძველზე წარმოეშობა ხელშეკრულების ცალმხრივად, სრულად ან ნაწილობრივ შეწყვეტის საფუძველი, ის ვალდებულია აღნიშნულის თაობაზე წერილობით შეატყობინოს ბანკს არანაკლებ 60 (სამოცი) დღით ადრე, იმ შემთხვევაში, თუ ხელშეკრულების ვადა აღემატება 60 დღეს. იმ შემთხვევაში, თუ ხელშეკრულების ვადა ნაკლებია 60 (სამოცი) დღეზე, შეტყობინების ვადა არ შეიძლება იყოს 15 (თხუთმეტი) დღეზე ნაკლები. ხელშეკრულების 15 (თხუთმეტი) დღეზე ნაკლები ვადით დადების შემთხვევაში, შეტყობინების ვადა შეადგენს 1 (ერთი) დღეს.
- 7.3. ხელშეკრულების 7.1.2 პუნქტის საფუძველზე ბანკის ინიციატივით ხელშეკრულების ვადამდე სრულად ან ნაწილობრივ შეწყვეტის შემთხვევაში, ბანკი გამყიდველს გადაუხდის ნასყიდობის საგნის საფასურს, მხოლოდ ნასყიდობის საგნის იმ ოდენობით, რაც შესაბამისი მიღება-ჩაბარების აქტის საფუძველზე უკვე მიღებული აქვს ბანკს.
- 7.4. ხელშეკრულების სრულად ან ნაწილობრივ შეწყვეტა არ ათავისუფლებს გამყიდველს ხელშეკრულებით ნაკისრი ან/და კანონმდებლობით დადგენილი ვალდებულებების სრულად და ჯეროვნად შესრულებისაგან.

8. მხარეთა პასუხისმგებლობა

- 8.1. მხარეები იღებენ ვალდებულებას აუნაზღაურონ ერთმანეთს მათ მიერ ხელშეკრულების შეუსრულებლობის ან არაჯეროვნად შესრულების შედეგად მიყენებული ზიანი (ზარალი) კანონმდებლობით ან/და ხელშეკრულებით დადგენილი წესით.
- 8.2. გამყიდველი ვალდებულია, აუნაზღაუროს ბანკს ხელშეკრულების, აგრეთვე კანონმდებლობის დარღვევით, ხელშეკრულების შეუსრულებლობის ან არაჯეროვანი შესრულების გამო მიყენებული ნებისმიერი სახის პირდაპირი და არაპირდაპირი ზიანი, ასევე ხელშეკრულების საფუძველზე ბანკისაგან მიღებული ავანსის თანხა (ასეთის არსებობის შემთხვევაში). მათ შორის, იმ შემთხვევაშიც, თუ ზიანი დადგა გამყიდველის მიერ ხელშეკრულების ვადაზე ადრე შეწყვეტის შედეგად (გარდა იმ შემთხვევისა, როდესაც შეწყვეტის საფუძველია ბანკის მიერ ნასყიდობის ფასის გადახდაზე დაუსაბუთებელი უარი) და ბანკი მოკლებული იყო შესაძლებლობას, მიეღო შესრულება სხვაგვარად.
- 8.3. ხელშეკრულებიდან გამომდინარე ბანკის პასუხისმგებლობა შეზღუდულია გამყიდველისთვის მიყენებული პირდაპირი ზიანით. ამასთან, ბანკის პასუხისმგებლობის მაქსიმალური ოდენობა, არ შეიძლება აღემატებოდეს ხელშეკრულებით გათვალისწინებული საფასურის მთლიან ოდენობას. ბანკი არ აგებს პასუხს რაიმე სახის არაპირდაპირი ზიანისთვის, მათ შორის მიუღებელი შემოსავლისთვის და სხვ.
- 8.4. ნასყიდობის საგნის გადაცემისთვის განსაზღვრული ვადის დარღვევის ან/და ნაკლიანი ნივთის მიწოდების შემთხვევაში, ბანკი უფლებამოსილია გამყიდველს მოსთხოვოს, ხოლო ასეთი მოთხოვნის შემთხვევაში გამყიდველი ვალდებულია ბანკს გადაუხადოს შესაბამისი პირგასამტეხლო ნასყიდობის ხელშეკრულებით განსაზღვრული ოდენობით.
- 8.5. ბანკის მიერ, გამყიდველისთვის ნასყიდობის საგნის საფასურის განსაზღვრულ ვადაში გადაუხდელობის შემთხვევაში, ბანკი ვალდებულია, გადაუხადოს გამყიდველს ნასყიდობის ხელშეკრულებით გათვალისწინებული პირგასამტეხლო, ასეთი მოთხოვნის შემთხვევაში;
- 8.6. პირგასამტეხლოს გადახდა არ ათავისუფლებს მხარეებს ვალდებულების ჯეროვანი შესრულების ან/და დარღვევის აღმოფხვრის ვალდებულებისაგან.
- 8.7. ყოველგვარი ეჭვის თავიდან ასაცილებლად, მხარეები აცხადებენ, რომ ხელშეკრულებით განსაზღვრული ნებისმიერი პირგასამტეხლოს მოვალე (დამრღვევი) მხარისათვის დაკისრება წარმოადგენს კრედიტორი (არადამრღვევი) მხარის უფლებას და არა ვალდებულებას.
- 8.8. ბანკი უფლებამოსილია, დააკავოს და გაქვითოს გამყიდველისთვის გადასახდელი თანხები, იმ შემთხვევაში, თუ გააჩნია წინამდებარე ხელშეკრულებიდან გამომდინარე საპასუხო ფულადი მოთხოვნა გამყიდველის მიმართ. აღნიშნული უფლების გამოყენების შემთხვევაში, გამყიდველი მიიღებს საფასურს/ანაზღაურებას გაქვითული თანხის კვალობაზე.
- 8.9. გამყიდველი ვალდებულია აუნაზღაუროს ბანკს ნებისმიერი ზიანი/ზარალი, რომელიც გამომდინარეობს ბანკისაგან მიღებული მასალის (მათ შორის მოძრავი ან/და უძრავი ქონების) ან/და გამყიდველის მიერ დამზადებული ნაკეთობის დაზიანების, დაკარგვის ან/და განადგურების შედეგად.
- 8.10. იმ შემთხვევაში, თუ გამყიდველის წარმოადგენს იმ პროდუქტის მწარმოებელს, რომლის მიწოდებაც გათვალისწინებულია ბანკისათვის, გამყიდველი პასუხისმგებელია პროდუქტით გამოწვეული ნებისმიერი ზიანისა

და ზარალისათვის. გამყიდველი აგრეთვე წარმოადგენს პასუხისმგებელ პირს, თუ მან იცოდა ნასყიდობის საგნის ნაკლის ან მისგან გამოწვეული შესაძლო ზიანის შესახებ და მან არ აცნობა ბანკს, მიუხედავად იმისა, წარმოადგენს თუ არა მწარმოებელს.

9. კომუნიკაცია, შეტყობინებები

- 9.1. მხარეთა შორის ნებისმიერი ოფიციალური ურთიერთობა უნდა ატარებდეს წერილობით (როგორც ბეჭდური ისე ელექტრონული სახით) ფორმას. მხარისათვის გათვალისწინებული წერილობითი შეტყობინება მას შეიძლება მიეწოდოს პირადად ან გაეგზავნოს კურიერის ან საფოსტო გზავნილის საშუალებით. ოპერატიულობის მიზნით და ქვემოთ მოცემული დებულებების გათვალისწინებით, დასაშვებია გამყიდველისთვის შეტყობინების მიწოდება ელექტრონული ფოსტის გაგზავნის გზით.
- 9.2. მხარეები თანხმდებიან, რომ გამყიდველის მიერ გაცხადებულ ელექტრონული ფოსტის მისამართზე, რომელიც მითითებულია ხელშეკრულებაში, გამყიდველის მიერ ბანკისათვის მიწოდებულ/წარდგენილ ნებისმიერ დოკუმენტში ან/და ნებისმიერ საჯარო წყაროში, გაგზავნილი ელექტრონული შეტყობინება ითვლება გამყიდველის ოფიციალურად ჩაბარებულ შეტყობინებად, შეტყობინების გაგზავნიდან მეორე დღეს.
- 9.3. მხარეები ურთიერთობას განახორციელებენ ხელშეკრულებით განსაზღვრულ მისამართზე (ან სხვა ნებისმიერ მისამართზე, რომელსაც ერთი მხარე აცნობებს მეორეს წერილობით). მხარე ვალდებულია აღნიშნული მისამართ(ებ)ის ან მათი რომელიმე მონაცემის ცვლილების შესახებ დაუყოვნებლივ აცნობოს მეორე მხარეს, წინააღმდეგ შემთხვევაში, მხარის მიერ აღნიშნულ მისამართზე გაგზავნილი შეტყობინება ჩაითვლება ჯეროვნად ჩაბარებულად.

10. ფორს-მაჟორი

- 10.1. მხარეთა მიერ ხელშეკრულების პირობების შეუსრულებლობა არ გამოიწვევს საჯარიმო სანქციების გამოყენებას, თუ ხელშეკრულების შესრულების შეფერხება ან მისი ვალდებულებების შეუსრულებლობა პირდაპირ არის დაკავშირებული ფორს-მაჟორული გარემოების შედეგთან;
- 10.2. ამ მუხლის მიზნებისათვის „ფორს-მაჟორი“ ნიშნავს მხარეებისათვის გადაუღებელ და მათი კონტროლისაგან დამოუკიდებელ გარემოებებს, რომლებიც არ არიან დაკავშირებული მხარეების შეცდომებსა და დაუდევრობასთან და რომლებსაც გააჩნია წინასწარ გაუთვალისწინებელი ხასიათი. ასეთი გარემოება შეიძლება გამოწვეული იქნას ომით, სტიქიური მოვლენებით, ეპიდემიით, კარანტინით და საქონლის მიწოდებაზე ემბარგოს დაწესებით და სხვა;
- 10.3. ფორს-მაჟორული გარემოებების დადგომის შემთხვევაში, მხარემ, რომლისთვისაც შეუძლებელი ხდება ნაკისრი ვალდებულებების შესრულება, დაუყოვნებლივ უნდა გაუგზავნოს მეორე მხარეს წერილობითი შეტყობინება ასეთი გარემოებების და მათი გამომწვევი მიზეზების შესახებ. თუ შეტყობინების გამგზავნი მხარე არ მიიღებს მეორე მხარისაგან წერილობით პასუხს, იგი თავისი შეხედულებისამებრ, მიზანშეწონილობისა და შესაძლებლობისა და მიხედვით აგრძელებს ხელშეკრულებით ნაკისრი ვალდებულებების შესრულებას და ცდილობს გამონახოს ვალდებულებების შესრულების ისეთი ალტერნატიული ხერხები, რომლებიც დამოუკიდებელი იქნებიან ფორს-მაჟორული გარემოებების ზეგავლენისაგან.
- 10.4. იმ შემთხვევაში, თუ მხარე, რომლისთვისაც შეუძლებელი ხდება ფორს-მაჟორული გარემოების დადგომის მიზეზით ხელშეკრულებით ნაკისრი ვალდებულებების შესრულება, აღნიშნული გარემოების დადგომის შესახებ ინფორმაციის მიღებისთანავე არ განახორციელებს მეორე მხარისათვის შესაბამისი შეტყობინების გაგზავნას, არ თავისუფლდება საჯარიმო სანქციების გადახდის ვალდებულებისგან.
- 10.5. იმ შემთხვევაში, თუ ფორს-მაჟორული გარემოება გრძელდება 3 თვეზე მეტი ვადის განმავლობაში, მეორე მხარე უფლებამოსილია შეწყვიტოს ხელშეკრულების მოქმედება, მხარისთვის შეტყობინებით.

11. დავის განხილვის წესი

- 11.1. მხარეები უზრუნველყოფენ, რომ ხელშეკრულების ირგვლივ წამოჭრილი ნებისმიერი უთანხმოება მხარეთა შორის გადაწყდეს მოლაპარაკების გზით. მხარეთა შეუთანხმებლობის შემთხვევაში, წინამდებარე ხელშეკრულებასთან დაკავშირებული ნებისმიერი შინაარსის დავა (მათ შორის, ხელშეკრულების არსებობასთან, ინტერპრეტაციასთან, შესრულებასთან და აღსრულებასთან დაკავშირებით) განიხილება საქართველოს საერთო სასამართლოების მიერ, საქართველოს კანონმდებლობის შესაბამისად.

12. დასკვნითი დებულებები

- 12.1. ხელშეკრულება ძალაში შედის მხარეთა მიერ მისი ხელმოწერისთანავე (თუ ხელშეკრულებით სხვა რამე არ არის გათვალისწინებული) და მოქმედებს მხარეთა მიერ ნაკისრი ვალდებულებების სრულად შესრულებამდე. ხელშეკრულების დადების თარიღად მიიჩნევა ხელშეკრულების არსებით პირობებში მითითებული თარიღი.
- 12.2. წინამდებარე ხელშეკრულებაზე მხარეთა ხელმოწერის დადასტურების მიზნით მხარეები ვთანხმდებიან, რომ მხარეებს უფლება აქვთ წინამდებარე ხელშეკრულებაზე, მასთან დაკავშირებულ დანართებსა და სხვა დაკავშირებულ დოკუმენტებზე ხელმოწერისთვის გამოიყენონ ელექტრონული ხელმოწერა როგორც

- კვალიფიციური, აგრეთვე განვითარებული. ამასთან, შესაძლოა კონკრეტული გარიგება ითვალისწინებდეს მხოლოდ კვალიფიციური ხელმოწერით დადასტურების მოთხოვნას ბანკის მიერ;
- 12.3. მხარეები ადასტურებენ, რომ ელექტრონული ხელმოწერის გამოიყენების შემთხვევაში, ელექტრონული ფორმით (მათ შორის და არა მხოლოდ, ელექტრონული ხელმოწერის პლატფორმა Signify-ის მეშვეობით) შესრულებულ ხელმოწერას (მათ შორის კვალიფიციურ ან განვითარებულ ელექტრონული ხელმოწერას), საქართველოს კანონმდებლობისა და მხარეთა წინამდებარე შეთანხმების შესაბამისად, გააჩნია წერილობითი/მატერიალური დოკუმენტისა და პირადი ხელმოწერის ტოლფასი/თანაბარი იურიდიული ძალა, რასაც მხარეები არ აყენებ და არ დააყენებენ ეჭვქვეშ. შესაბამისად, ნებისმიერი გარიგების ელექტრონული ფორმით ხელმოწერა/დადასტურება არ შეიძლება გახდეს მხარეთა შორის სადავო ასეთი გარიგების ნამდვილობის თვალსაზრისით.
- 12.4. **კონტრაქტი აცხადებს თანხმობას:**
- 12.4.1. ბანკმა / ელექტრონული ხელმოწერი მომწოდებელმა კომპანიამ ელექტრონული ხელმოწერის მიზნებისთვის დაამუშაოს ბანკში დაფიქსირებული ან ბანკისთვის ნებისმიერი წყაროდან გაზიარებული/მიღებული კონტრაქტის ან/და კონტრაქტის წარმომადგენლის პერსონალური მონაცემები, მათ შორის სახელი, გვარი, პირადი ნომერი, ელექტრონული ფოსტის მისამართი და მობილური ტელეფონის ნომერი, ხოლო იმ შემთხვევისთვის თუ კონტრაქტის წარმომადგენლობა უზრუნველყოფილია მინდობილი პირის/წარმომადგენლის მეშვეობით, ასევე დაამუშაოს ასეთი წარმომადგენლის იგივე პერსონალური მონაცემები;
- 12.4.2. კონტრაქტი აცნობიერებს, რომ შესაბამისი მინდობილობის საფუძველზე მინდობილი პირის მიერ კონტრაქტის სახელით ბანკთან განხორციელებული ნებისმიერი ქმედება, გაფორმებული/ხელმოწერილი შეთანხმება სამართლებრივ შედეგებს წარმოშობს კონტრაქტისთვის, მათ შორის, მინდობილი პირის ელექტრონული ხელმოწერის გამოყენების შემთხვევაში;
- 12.4.3. ბანკი პასუხს არ აგებს კონტრაქტის მიერ ან შესაბამისი წარმომადგენლობის საფუძველზე მინდობილი პირის/წარმომადგენლის მიერ, კონტრაქტის სახელით ბანკში შეცვლილი ან/და ბანკისთვის მიწოდებული კონტრაქტის საკონტაქტო მონაცემების, მათ შორის ელექტრონული ფოსტის მისამართის, მობილური ტელეფონის ნომრის გამოყენებით ბანკის მიერ გაგზავნილი შეტყობინების ან სხვა ნებისმიერი ინფორმაციის ამსახველი დოკუმენტაციის სხვა პირის მიერ მიღებით გამოწვეულ შედეგ(ებ)ზე, ისევე როგორც ბანკი არ აგებს პასუხს ასეთი საკონტაქტო მონაცემების სხვა პირის მიერ გამოყენებაზე, მათ შორის კონტრაქტის მობილური ტელეფონის ნომრის მეშვეობით სხვა პირის მიერ განხორციელებულ ქმედებაზე ან კონტრაქტის ელექტრონული ფოსტის მისამართიდან სხვა პირის მიერ გამოგზავნილი შეტყობინების ან სხვა ნებისმიერი ინფორმაციის ამსახველი დოკუმენტაციის ბანკის მიერ მიღებით და შესაბამისად ქმედების განხორციელებით/ქმედების განხორციელებისაგან თავის შეკავებით გამოწვეულ შედეგ(ებ)ზე.
- 12.4.4. კონტრაქტი თავად არის ვალდებული, გამართულ მდგომარეობაში და რელევანტურად დაცულ გარემოში შეინახოს ყველა ის ინფორმაცია თუ მოწყობილობა, რომელსაც იყენებს ელექტრონული ხელმოწერისთვის.
- 12.5. მხარეები ადასტურებენ, რომ ხელშეკრულების შინაარსი ზუსტად გამოხატავს მხარეთა ნებას და რომ მათ მიერ ნების გამოვლენა მოხდა ხელშეკრულების შინაარსის გონივრული განსჯის შედეგად და არა მარტოდენ სიტყვა-სიტყვითი მნიშვნელობიდან გამომდინარე.
- 12.6. ხელშეკრულებაში ცვლილებებისა და დამატებების შეტანა შესაძლებელია მხარეთა წერილობითი შეთანხმებით. ხელშეკრულებაში შეტანილი ნებისმიერი ცვლილება და/ან დამატება წარმოადგენს ხელშეკრულების განუყოფელ ნაწილს.
- 12.7. თუ ხელშეკრულების რომელიმე დებულება ბათილია ან მომავალში გახდება ბათილი, აღნიშნული არ გამოიწვევს მთლიანი ხელშეკრულების ბათილობას. ხელშეკრულების დანარჩენი მუხლები/პუნქტები განაგრძობს მოქმედებას ბათილი დებულების გარეშე.
- 12.8. ხელშეკრულების ერთ-ერთი მხარის მიერ ხელშეკრულებით მინიჭებული უფლების გამოუყენებლობა არ წარმოადგენს ამ უფლებაზე უარის თქმას.
- 12.9. იმ საკითხებზე მსჯელობისას რაც არ არის გათვალისწინებული ხელშეკრულებით, მხარეები იხელმძღვანელებენ კანონმდებლობით დადგენილი შესაბამისი ურთიერთობის მარეგულირებელი ნორმებით და/ან დამატებით შეთანხმებული პირობებით.
- 12.10. ხელშეკრულების ყველა პირობა და დებულება ვრცელდება და სავალდებულოა მხარეთა უფლებამონაცვლების, სამართალმემკვიდრეების, წარმომადგენლების, რწმუნებულებისა და თანამშრომელთათვის.